

明史彙

列傳第六十五

光祿大夫 經筵講官明史總裁戶部尚書加七級 王鴻緒奉

敕編撰

韓文

領生 陳仁

王璟

張敷華

楊守隨

弟守鵬

許進

子讀

諸

雍泰

張津

陳壽

樊瑩

熊繡

潘蕃

胡富

張泰

吳文度

張彙

昌政

朱欽

韓文宇貫道洪洞人宋宰相琦後也生時父夢紫衣人抱送

文彥博至其家故名之曰文成化初舉進士除工科給事中

累章州軍功劾寧晉伯劉聚都御史王越馬文升等濫殺安

報尋劾越薦李秉王竑語頗涉兩宮帝怒撻之文華殿庭已進右給事中出爲湖廣右參議中貴督太和山乾沒公費文力遏之以其羨易粟萬石備賑貸九谿土酋與鄰境爭地相攻文往諭皆服閏七年轉左弘治改元王恕以文久淹用爲山東左參政居二年用倪岳薦擢雲南左布政使以右副都御史巡撫湖廣移撫河南召爲戶部右侍郎母喪除起改吏部進左十六年拜南京兵部尚書歲饑米價翔踴文請預發軍餉三月戶部難之文曰救荒如救焚有罪吾自當之乃發廩十六萬石米價爲平召拜戶部尚書文凝厚雅粹居常抑抑至臨大事剛斷無所撓武宗卽位賞賚及山陵大婚諸費需銀百八十萬兩有奇部帑不給文請先發承運庫詔不許

文言帑藏虛賞賚自京邊軍士外請分別給銀鈔稍益以內庫及內府錢并暫借助戚賜莊田稅而收承運庫內官核所積金銀著之籍且盡罷諸不急費帝不欲發內帑命文以漸經畫文持大體務爲國惜財其人陳應循大國師那卜堅參等落職文請沒其貲實國帑舊制監局倉庫內官不過二三人後漸添注或一倉十餘人上林苑林衡署至三十二人文力請裁汰淳安公主賜田三百頃復欲奪任丘民業文力爭乃止孝宗時外戚慶雲壽寧侯家人及商人譚景清等奏請買補殘鹽至百八十萬引及孝宗欲更新庶政文條鹽政夙弊七事論殘鹽尤切孝宗嘉納未及行而崩卽入武宗登極詔中罷之侯家復奏乞下部更議文等再三執奏弗從竟如

侯請正德元年内閣及言官復論之詔下廷議文言鹽法之設專以備邊今山陝饑寇方大入度支匱絀飛輓甚難奈何壞祖宗法忽邊防之重疏上閣臣劉健等力持之景清復陳乞如故於是文等劾其桀悍請執付法官帝不得已始寢前命榮王乞霸州莊田崇王請自徵莊田租勿令有司與文皆持却之保定巡撫王璟請革皇莊支覆如其議帝不許文請召民佃畝徵銀三分輸內庫而盡撤中官管莊者乃命留中官各一人校尉十人餘如文議中旨索寶石西珠文請屏絕奇珍以養儉德報可帝將大婚取戶部銀四十萬兩文疏請得免四之一文司國計二年力遏權倖權倖深疾之而是時青宮舊奄馬永成等八人號八虎日導帝徇馬鷹兔歌舞角

觥不親萬幾文每退朝對僚屬言及輒泣下郎中李夢陽進
曰公大臣義共國休戚徒泣何爲諫官疏劾諸奄執政持甚
力公誠及此時率大臣固爭去八虎易耳文將鬚昂肩毅
然改容曰善縱事勿濟吾年足死矣不死不足報國遂令夢
陽草疏疏具文讀而刪之遂偕諸大臣伏闕上言人主辨奸
爲明人臣犯顏爲忠況羣小作朋逼近君側安危治亂胥此
焉關臣等備員股肱當王少國疑之日仰察天象俯揆物議
瞻前思後憂心如焚至長涕泣不能自已伏觀近歲朝政日
非號令失當自入秋末視朝漸晚仰窺聖容日漸清削皆言
太監馬永成谷大用張永羅祥魏彬丘聚劉瑾高鳳等造作
巧僞淫蕩上心擊毬走馬放鷹逐犬俳優雜劇錯陳於前至

導萬乘與外人交易狎驩媒衺無復禮體日遊不足夜以繼之勞耗精神虧損志德遂使大道失序地氣靡寧雷異星變桃李秋華考厥占候咸非吉徵此輩細人惟知蠱惑君上以便已私而不思赫赫天命皇皇帝業在陛下一身今大婚雖畢儲嗣未建萬一遊宴損神起居失節雖薤粉若輩何補於事高皇帝艱難百戰取有四海列聖繼承以致陛下先帝臨崩顧命之語陛下所聞也太何姑息羣小置之左右以累聖德竊觀前古奄宦誤國爲禍尤烈漢十常侍唐甘露之變其明驗也今永成等罪惡旣著若縱不治將來益無忌憚必患在社稷伏望陛下奮乾剛剛私愛上告兩宮下諭百僚明正典刑以回天地之變泄神人之憤潛削禍亂之階永保靈長

之業疏入帝驚泣不食璉等大懼時內閣劉健等方持言官
章不肯下文疏復入帝遣司禮中官八人詣閣議一日三至
健等持益堅王岳者八人中一人也獨曰閣議是明日召諸
大臣入諸大臣或咎文文不應令侍郎王鏊詣闕探動靜健
語鏊曰事且成十七八頃公第持之至左順門李榮手諸大
臣疏曰有旨問諸先生曰先生言良是第奴儕事上久不忍
卽置理幸少寬之上自處耳衆相顧莫敢言榮謂文曰此舉
出自公公云何文曰今海內民窮盜起水旱頻仍天變日增
文等備員卿佐靡所匡救上始踐阼輒輕萬幾遊宴無度狎
昵羣小何忍無言鏊曰八人不去亂本不除天下何由治榮
曰疏備矣上非不知第欲少寬之耳鏊直前曰設上不處奈

何榮曰榮頸有鐵裹即敢墮國事是日瑾等益窘求南京安
置閣議猶不肯下夜瑾等環哭帝前頭觸地曰微上恩奴僕
磔餒狗矣帝色動瑾又進曰言奴儕者王岳也帝怒夜收岳
立詔瑾入司禮永成等分據要地而大權悉歸瑾矣瑾恨文
甚日令人伺文過踰月有以偽銀輸內庫者遂以爲文罪詔
降一級致仕謫郎中陳仁爲副州同知給事中徐昂救文中
旨責其黨護落文職以顧佐代并除昂名尋指文爲奸黨榜
朝堂其子高唐知州士聰刑部主事士奇皆削籍文出都門
乘一籃輿行李一車而已瑾恨猶未已坐以遺失部籍逮文
及侍郎張縉下詔獄數月始釋罰米千石輸大尉尋復羅織
他事罰米者再家業蕩然瑾誅假官致仕世宗卽位遣行人

齋壘書存問賚羊酒復令有司月給廩四石歲給役夫六人終其身嘉靖五年年八十有六卒贈太傅諡忠定士聰舉人罷官後不復仕士奇進士終湖廣參政少子士賢亦由舉人爲開封同知孫廷璋進士行太僕卿顧佐字良弼臨淮人成化五年進士授刑部主事歷郎中按錦衣指揮牛循中官顧雄鍾欽罪無所撓出爲河間知府弘治中再遷大理少卿擢右僉都御史巡撫山西宗室第宅官爲繕費不貲佐請悉令自營治正統末權發太原平陽民戍邊後遂久不代佐奏令代遷入爲左副都御史勘罷遼東總兵官李杲太監任良巡撫張玉歷戶部左右侍郎出理陝西軍食善區畫儲蓄餘三年正德改元代韓文爲尚書劉瑾憾文摺撫萬端部有故冊

逸欲以爲文罪逼佐上其事佐不可詔奪俸三月佐乃再疏乞歸瑾憾之三罰米輸塞上至千餘石家貧稱貸以償卒贈太子太保王璟字廷采沂人成化八年進士爲登封知縣歷兩京御史弘治十四年以南京鴻臚卿拜右僉都御史理兩浙鹽政賑荒浙江奏行荒政十事多所全活十七年冬巡撫保定武宗立太監夏綬乞於真定諸府歲加葺場稅少監傅琢請履畝覈靖海永清隆平諸縣田太監張峻欲稅寧晉小河往來客貨詔皆許之又以莊田故遣緹騎逮民魯堂等二百餘人畿南騷動璟抗疏切諫尚書文等力持之管莊內臣稍得召還已引疾致仕命馳傳歸坐累奪官閒住正德六年起撫山西製火槍萬餘槍藏箭六皆傳毒藥用以禦寇寇不

敢西累遷右都御史已遷左以張綸爲右都御史代之後陳
金以太子太保左都御史入院位璟上人號璟中都御史焉
時羣小用事大臣靡然附之璟獨守故操再進太子太保世
宗立致仕卒贈少保諡恭靖初璟自保定巡撫歸其後兵科
給事中高滂勘滄州營山牧地劾五十三人及璟與前巡撫
高銓銓卽滂父也劉瑾以當坐者衆令去職者勿問璟銓竝
獲免銓江都人登進士累官南京戶部尚書正德二年廷推
左都御史瑾勒令致仕尋坐事逮下獄復坐隆平侯家襲爵
事除名罰米五百石後瑾益事操切每遣使勘核多務苛急
承瑾意滂遂并銓在劾中滂後官至光祿少卿以劾父不齒
於人瑾誅銓復官致仕卒贈太子少保陳仁字子居莆田人

成化末進士弘治中官戶部郎中闕里先聖廟災疏請修省
陝西進古縣仁抗疏斥其僞詔召番僧領占竹於四川仁疏
諫又請復建文忠臣方孝孺等官多格不行正德初瑾以賈
銀事坐尚書文罪仁竝謫後遷南京兵部員外郎瑾誅累擢
至浙江右布政使

張敷華字公實安福人父洪御史死土木難敷華少負氣節
年七歲里社樹爲祟麾羣兒盡伐之景泰初錄死事後入國
學舉天順八年進士選庶吉士成化初館試授職與劉大夏
願就部曹乃除兵部主事歷郎中廉重不撓名等於大夏遷
浙江參議景寧礦盜起至數千人敷華馳檄之執其魁十二
人居浙十餘年歷右參政右布政使弘治初遷湖廣歲饑令

府縣大修學宮以儲直資餓者擢右副都御史巡撫山西中道奔喪服闋還故官部內賦輸大同困於折價數華請太原以北利轉運者仍輸米民便之改撫陝西製婚娶喪葬之式納民於禮妖僧據終南山廷議用兵尚書馬文升曰張都御史能辦此數華果以計縛僧歸遷南京兵部右侍郎十二年改右都御史總督漕運兼巡撫淮揚諸府高郵湖堤圯浚深溝以殺水勢又築寶應堤民利賴焉改掌南京都察院與吏部尚書林瀚僉都御史林俊祭酒章懋稱南都四君子就遷刑部尚書正德元年召爲左都御史其冬大臣與言官請去劉瑾等內閣力主之帝猶豫數華乃上言陛下宴樂逸遊日狎儉壬政令與詔旨相背行事與成憲交乖致天變上千人

心下拂今給事中劉蒞御史朱廷聲徐鉉等連章論列但付所司英國公懋與臣等列名上請但云朕自處置臣竊歎惑請略言時政之弊如四十萬庫藏已竭而取用不已六七歲童子何知而招爲勇士織造已停傳奉已革尋復如故鹽法莊田方遣官清覈而奏乞之疏隨聞中官監督京營鎮守四方者一時累有更易政令紛拏弊端滋蔓夫國家大事百人爭之不足數人壞之有餘願陛下審察疏入不報旣而朝事大變宦官勢益張至除夕朝罷忽傳旨與楊守隨俱致仕數華卽日就道至徐州洪坐小艇觸石幾溺死瑾恨未已欲借湖廣倉儲浥爛坐以賊罪修楔康海過瑾曰吾素人愛張公如父母公忍相薄耶瑾意乃解猶坐數華與守隨等五十二

人爲奸黨楊之朝堂家居一年病且革衣冠揖家廟就塋
卒瑾誅後二年贈太子少保諡簡肅敷華性剛介弘治時劉
大夏嘗薦之帝曰敷華誠佳但爲人太峻耳爲部郎奉使盜
探其囊得七金而已孫鰲山官御史

楊守隨字維貞鄞人侍郎守陳從弟也舉成化二年進士授
御史巡視漕運覈大同軍餉巡按江西所至以風采見憚疏
陳六事言郕王受命艱危時削平禍亂功甚大歿乃諡以戾
人心不平此非先帝意權奸逞私憾者爲之也亟宜改易彰
陛下親親之仁尚書李秉一時良臣爲蕭彥莊所逐乞卽召
還律令犯公罪者不罷近御史朱賢婁芳等竝除名乞復其
官且戒所司毋法外加罪西征之役以數萬甲兵討出沒不

常之寇千里轉輸曠日持久恐外患未平內地先敝乞速班師戒邊臣慎封守近例軍官犯罪未結正者遇赦卽原致此曹遷延以希倖免自今衆証明白者卽據律定案毋使逃罪在外官俸兵餉有踰年不給者由郡縣蓄積少也請於起運外量加存留以濟乏匱疏奏時不能從太常少卿孫廣安母喪起復守隨與給事中李和等連章論之乃令守制八年冬以災異陳時政九事廷議四方災傷停遣刷卷御史會昌侯孫繼宗請并停在京者守隨言繼宗等任情作奸多無案牘恐罪及假此祈免帝置繼宗不問而刷卷如故山東饑廷議吏納銀免考授冠帶守隨極言不可帝卽罷之擢應天府丞未上母憂歸服除補官初李致省授太常寺丞因守隨言改

上林監副憾之至是譴於帝中旨責守隨不當添注貶南寧知府弘治初召爲應天府尹勘南京守備中官蔣琮罪琮嗾其黨郭鏞劾守隨按給事方向獄不公責遷廣西右參政久之進按察使八年召爲南京右僉都御史提督操江歷兩京大理卿九載滿進工部尚書仍掌大理寺刑部獄送寺覆讞者多加刑主事朱塋論其非守隨言自永樂間寺已設刑具部囚多未得實安得不更訊帝乃寢塋奏孝宗崩中官張瑜等以誤用御藥下獄守隨會訊杖之中官李興擅伐陵木論死令家人以銀四十萬兩求變其獄守隨持之堅獄不得解廷臣之爭餘鹽也中旨詰是何大事守隨語韓文曰事誠有大於是者文遂偕九卿伏闕論八黨文等既逐守隨憤獨上